



Lu miraculu ri Santa Lucia

*Mi rissi me nanna, quann'era nica:
«Ora ti cuntù 'na storia antica».
'Ncapu li ammi mi fici assittari
e araciu araciu si misi a cuntari:*

*«Ci fu 'na vota, a Siracusa
'na caristia troppu dannusa.
Pani 'un cinn'era e tanti famigghi
'unn'arriniscianu a sfamari li figghi.
Ma puru 'mmenzu a la disperazioni
nun ci mancava mai la devozioni
e addumannavanu a Santa Lucia
chi li sarvassi di la caristia.
Un beddu jornu arriva di luntanu
rintra lu portu siracusanu
'na navi carrica di furmentu
a liberalli ri 'ddu tormentu.
Pi li cristiani la gioia fu tanta
chi tutti giravanu «viva la Santa!»
Picchi fu grazii a la so 'ntercessioni
ch'avìa arrivatu 'dda binidizioni.
Tutti accurrianu a la marina,
ma era furmentu, 'unn'era farina
e cu un pitittu ch'un facìa abbintari
'un c'era tempu di iri a macinari.
Pi mettisi subitu 'n'sarvamentu
avianu a cociri lu stessu furmentu
e pila forma «a coccia» ch'avìa
accuminciaru a chiamalla «cuccìa».*

*La bona nova arrivà luntana
e pi sta màrtiri siracusana
fu accussi granni la venerazioni
chi fici nasciri 'na tradizioni.
Passà lu tempu di la caristia
e arristà l'usanza, pi Santa Lucia,
di 'un fari pani, di 'un cociri pasta,
e di manciari la cuccìa e basta.
Ma lu sapemu, ci voli picca
e l'usanza di scarsa addiventa ricca.
A ognunu ci vinni la bedda pinzata
di preparalla chiù elaborata.
Cu ci mittìa lu biancumanciaru
e cu vinu cottu ci vosi 'mmiscari.
Cu ci vulìa lu meli li ficu
e tanti atri cosi chi mancu ti ricu.
Ma je vulissi sapiri, a la fini,
di runni spuntaru li beddi arancini?
E m'addumànnu di quali manu
nasceru panelli e risattianu».*

*E amentri chi me nanna si sfirmiciàva,
a mia lu stommacu mi murmuriava
e mi ricordu chi ci avissi rittu:
«nonnà, zitemuni ch'haiu pitittu!»*

Claudia Agnello